

Ro Sueat ni Pablo sa **Mga Taga-Colosas**

Haunang mga Bisaea

Ku tyempo ni Apostol Pablo, ro Colosas hay isaea anay nga ka bantog nga syudad. Makaron, ro Colosas hay sakop ku nasyon nga Turkey. Ro syudad it Colosas hay mga 160 kilometros halin sa syudad it Efeso.

Ro mga Phrygiano hay mga tumandok sa raya nga lugar pero abo man nga mga Griego ag mga Judio nga nag-istar idto. Siguro hay may una man nga mga Phrygiano, Griego ag Judio nga mga tumueuo ni Kristo idto sa Colosas.

Ku tyempo nga nagsueat si Apostol Pablo sa mga taga-Colosas hay basi owa pa imaw nakaadto o nakawali ku Mayad nga Balita idto. Mahambae naton ra dahil suno sa Kapitulo 2, bersikulo 1 ku raya nga sueat hay owa nana makilaea it personal ro kaeabanan ku mga tumueuo idto.

Kat gin-obra ni Pablo daya nga sueat hay idto imaw sa prisohan. Ro prisohan ngato hay basi idto sa syudad it Roma (Mga Binuhatan 28:16-31). Ginpriso imaw dahil sa anang pagtuo kay Jesus. Samtang idto si Pablo sa prisohan hay ginbisitahan imaw ni Epafras. Imaw ra ro hauna nga nagwali ku Mayad nga Balita idto sa Colosas. Ginsugiran ni Epafras si Pablo nga may mga tawo idto nga nagaturo it saea. Duyon ro rason kon ham-an it ginsueatan nana ro mga tumueuo sa Colosas. Gusto nana nga sanda hay magpadayon sa pagtuo sa minatuod nga mensahi parti kay Jesus ag indi magpadaea-daea sa mga nagaturo it saea.

Raya ro daywang ka pinakadelikado nga ginaturo ku mga Judio nga nagaturo it saea idto sa Colosas nga makasamad sa pagtuo ku mga tumueuo idto:

1. Ginaturo nanda nga indi pagbatunon it Dyos ro isaeang ka tawo kon indi anay imaw mangin Judio. Ro halimbawa karon hay kon ro isaeang ka bukun it Judio hay mangin tumueuo, dapat gid anay nga magpatuli imaw agod ipakita nga imaw hay hatapoe eon sa mga tawo nga ginpili it Dyos, ag raya hay ro mga Judio. Ro sabat ni Pablo kara hay mabasa sa 2:11-12.

2. Ginaturo man nanda nga ro mga tumueuo hay dapat nga magsunod gihapon sa mga kasuguan nga gintao it Dyos kay Moises ag dapat gid nga mag-obsarbar ku mga bueuhaton sa mga kapistahan it mga Judio agod batunon sanda it Dyos. Naghambae man sanda nga ro tanan nga mga tumueuo hay dapat gid nga magsunod sa iba pa nga mga ritwal ag sueundanan ku mga Judio parti sa kon ano ro bawae ag bukon it bawae nga kan-on ukon imnon. Ro sabat ni Pablo parti kara hay makita sa 2:13-16.

May mga Griego man sa Colosas nga nagaturo it saea mga makasamad sa pagtuo ku mga tumueuo idto. Raya ro daywa sa andang ginaturo:

1. Ro mga Griego hay nagapati nga ro matuod nga Dyos hay mayad pero bukon it imaw ro Dyos nga nagtuga ku kalibutan. Nagapati sanda nga ro mga maeain nga espirito nga may mahina nga gahom kaysa sa Dyos ro nagtuga ku kalibutan ag ku tanan nga iya. Ag nagapati man sanda nga ro tanan sa kalibutan hay maeain.

Ro kabilugan ku buot hambaeon it sabat ni Pablo sa rayang mga saea nga pagturo hay makaraya: “Ro Dyos, kaibahan si Kristo, ro nagtuga ku tanan nga una sa eangit ag sa eugta (1:16). Si Kristo ro nagahari sa tanan nga gintuga ag imaw ro nagakontrol ku tanan agod ro tanan nga butang hay magapabilin sa anang tama nga lugar (1:17). Kat namatay si Kristo sa krus hay ana nga ginpirdi ro tanan nga maeain nga mga espirito maskin mauno sanda kagamhanan. Ngani, owa it rason ro mga tumueuo nga mahadlok sa mga maeain nga espirito dahil si Jesus hay mas gamhanan kaysa kanda tanan” (2:9-10).

2. Ro mga Griego hay nagapati man nga ro eawas it tawo hay maeain. Imaw ron ngani nga kon kanda ro Maneueuwas nga Pinadaea it Dyos hay indi makaadto iya sa kalibutan sa eawas it tawo ag indi puydi nga ikaeansang sa krus. Ngani, kon kanda hay basi ro eawas ngato ni Jesus hay ana ku isaeang ka mueto, ukon si Jesus hay bukon gid it Maneueuwas. Nagapati sanda nga si Jesus hay isaea eamang sa mga mayad nga tawo nga nagkabuhi sa rayang kalibutan.

Ro kabilugan ku buot hambaeon it sabat ni Pablo sa rayang saea nga mga pagturo hay makaraya: “Si Jesus hay katupong it Dyos sa tanan nga butang. Ro tanan nga pagkaDyos it Dyos hay una sa eawas ni Jesus kat imaw hay nanging tawo (1:19). Pati ro tanan nga pwerting kaeam ag hasayran it Dyos hay una kay Jesus (2:3). Paagi sa pag-antos ni Jesus kat gineansang imaw sa krus bilang pina sa

tanan nga maeain nga hinimuan it tawo, ro tanan-tanan sa eangit ag sa eugta hay nakapanumbalik sa Dyos (1:19-20).

1 ¹ Raya nga sueat hay halin kakon nga si Pablo nga apostol ni Kristo Jesus dahil sa pagbuot it Dyos ag kay Timoteo nga aton nga igmanghod sa pagtuo. ² Nagasueat kami kinyo nga mga katawhan it Dyos inha sa Colosas nga amon nga mga igmanghod kay Kristo nga nagapadayon nga matutom kana. Kabay pa nga pakamaayuhon kamo it Dyos nga atong Ama ag taw-an it anang kalinong sa inyong tagipusuon.

Ro Pangamuyo ni Pablo Para sa Mga Taga-Colosas

³ Kada magpangamuyo kami para kinyo hay ginapasaeamatan namon permi ro Dyos nga Ama ku aton nga Ginuong Jesu-Kristo ⁴ tungod habalitaan namon nga nagatuo eon kamo kay Kristo Jesus ag ginahigugma ninyo ro tanan nga mga katawhan it Dyos. ⁵ Ro inyo ngaron nga pagtuo ag paghigugma hay bunga ku inyong pagpaabot nga mabaton ninyo ro mga gintigana it Dyos para kinyo idto sa eangit. Hasayran ninyo ro parti rikara pagkabati ninyo ku matuod nga mensahi nga imaw ro Mayad nga Balita. ⁶ Rayang mensahi hay nagaeapnaag man sa bilog nga kalibutan. Bisan siin ra makaabot hay nagadinugang pa gid ro nagatuo kara ag nagabag-o ro kabuhi ku mga nagatuo pareho man sa natabo inha kinyo. Halin ku pagkabati ninyo ku Mayad nga Balita hay inyo nga haeubtan it mayad kon ano gid ro kaeuoy it Dyos nga anang ginpakita pageuwas nana kinyo. ⁷ Gintud-an kamo parti rikaron ni Epafras nga amon inha nga kasal-i nga palangga ag matutom namon nga kaibahan sa pagserbi kay Jesu-Kristo. ⁸ Ginsugiran man nana kami nga ginahigugma ninyo ro inyong mga isigkatumueuo tungod sa gugma nga una kinyo nga halin sa Espirito Santo.

⁹ Imaw ron ngani nga halin ku pagkasayod namon parti kinyo hay sige ro amon nga pagpinangamuyo para kinyo. Ginapangayo namon sa Dyos nga paagi sa anang Espirito hay taw-an nana kamo it tanan nga kaeam agod masayran ag maeubtan ninyo kon ano ro anang gustong ipaobra kinyo. ¹⁰ Dahil kon itugot nana ra, ro inyong pagkabuhi hay kon mauno dapat magkabuhi ro mga sumueunod it Ginuo ag ro tanan ninyo nga ginaobra hay makapalipay kana. Ginapangamuyo man namon nga makahimo kamo permi it tanan nga mayad nga buhat ag makilaea pa gid ninyo it mayad ro Dyos.

¹¹ Amon man nga ginapangayo nga paagi sa indi matupungan nga gahom it Dyos hay ana nga pabaskugon ro inyong buot agod mapasensyahan ninyo ro tanan nga kalisod nga inyong maagyan ag matakuran ninyo ron nga may kalipay. ¹² Amon man nga ginapangamuyo nga inyo permi nga pasaeamatan ro Ama tungod ginhimo nana kamo nga mangin bagay nga makabaton ku tanan nanang ginatigana sa anang mga katawhan idto sa eangit nga pwerti kahayag. ¹³ Ana kita nga gineuwas sa gahom ni Satanas nga nagahari sa mga tawo nga una pa sa kadueom ag ana kita nga ginsaylo sa paggahom ku anang palangga nga Unga. ¹⁴ Paagi sa ginhimo ku ana nga Unga hay naeuwasa kita nga nagakahueugan nga ginpatawad eon ro atong mga saea.

Si Kristo hay Eabaw sa Tanan

¹⁵ Si Jesu-Kristo ro nagapakita kon mauno ro Dyos nga indi makita. Una eon si Kristo bago pa gintuga ro bisan ano ag imaw hay eabaw sa tanan nga mga tinuga ¹⁶ tungod imaw ro ginpatuga it Dyos ku tanan nga una sa eangit ag sa eugta, makita man o indi, pati ro mga anghel ag ro iba pa nga klasi it mga espirito nga nagahari o nagadumaea, may gahom o may otoridad. Gintuga ku Dyos ro tanan paagi kay Kristo ag para man sa kadayawan ni Kristo. ¹⁷ Una eon si Kristo bago pa gintuga ro bisan ano ag imaw ro nagakontrol ku tanan nga butang agod ro tanan hay magapabilin sa anang tama nga lugar suno sa plano it Dyos. ¹⁸ Kon sa eawas pa, imaw ro ueo naton nga mga tumueuo ag kita hay ana nga eawas. Imaw ro ginhalinan ku atong bag-o nga kabuhi. Imaw man ro hauna nga nabanhaw^a agod imaw gid ro eabaw sa tanan ¹⁹ dahil ginplano gid it Dyos nga ro tanan-tanan gid ku ana nga pagkaDyos hay una man kay Kristo. ²⁰ Ag ginplano man it Dyos nga paagi kay Kristo hay makapanumbalik kana ro tanan sa eangit ag sa eugta. Paagi sa dugo ni Kristo nga nag-ilig tag gineansang imaw sa krus hay ginbuoe it Dyos ro nagaueot kana ag sa tawo.

²¹ Kamo kato hay nahamueag man sa Dyos ag ana kamo nga mga kaaway dahil sa inyong mga maeain nga ginaisip ag ginahimo. ²² Pero ginpapanumbalik eon kamo it Dyos kana paagi sa kamatayon ku anang unga sa krus agod makaatubang kamo kana nga balaan, putli ag owa it ikasaway. ²³ Matabo eang ra kon magpadayon

^a1:18 Rayang pagkabanhaw hay nagakahueugan nga “nabanhaw ag indi eon mamatay it uman.”

kamo sa inyo nga malig-on ag indi mahuyang nga pagtuo ag indi gid magduda nga mabaton ninyo ro mga mayad nga butang nga ginpromisa sa Mayad nga Balita nga inyong habatian. Ro Mayad nga Balita ngara hay ginasugid sa bilog nga kalibutan ag ako nga si Pablo hay ginpili it Dyos nga magsugid karon.

Ro Hilimuon ni Pablo Para sa Kamaeayran ku mga Tumueuo

²⁴ Nagakalipay ako makaron bisan nagakalisod ako dahil kinyo. Ginaantos ko ra tanan agod makompleto ko ro dapat kong antuson para kay Kristo para sa kamaeayran ku mga tumueuo nga anang eawas. ²⁵ Ro Dyos ro nagpili kakon nga magserbi para sa kamaeayran ku tanan nga mga tumueuo agod ikapahayag ko kinyo nga mga bukun it Judio ro bilog nga mensahi it Dyos ²⁶ nga owa anay nana ginpahayag kato tanan pero makaron hay ana eon nga ginpahayag katon nga anang mga katawhan. ²⁷ Ro gusto it Dyos nga ipahisayod katon hay kamo nga mga bukun it Judio hay hatapoe man sa anang makangawa-ngawa ag kanamion nga plano. Ag ro anang plano ngaron hay nga si Kristo hay una man sa inyong tagipusuon ngani sigurado kamo nga makapaeangit. ²⁸ Ro parti kay Kristo ro ginawali namon sa tanan nga mga tawo. Ginapaandaman namon sanda ag ginagamit namon ro tanan nga kaaeam nga gintao it Dyos sa pagturo kanda agod ikapaatubang namon sanda sa Dyos nga may hugot nga pagtuo kay Kristo ag owa it ikasaway. ²⁹ Ginatinguhaan ko gid nga mahimo ro trabaho nga ginsalig kakon it Dyos paagi sa gahom nga ginatao kakon ni Jesu-Kristo.

2 ¹ Gusto ko nga masayran ninyo nga nagatinguha gid ako nga makabulig kinyo tungod nahakat gid ako sa kamaeayran ninyo nga mga taga-Colosas ag taga-Laodicia nga owa nakakilaea kakon it personal pati man sa tanan nga mga tumueuo sa ibang lugar nga owa man nakakilaea kakon it personal. ² Ginatinguha ko gid nga makabulig kinyo agod magbaskog ro inyong buot ag agod maghiliugyon kamo nga may paghigugma sa kada isaea. Ag isaea pa hay agod maeubtan gid ninyo it mayad ag mangin kumbinsido gid kamo nga matuod ro mga bagay nga owa anay ginpahayag kato tanan it Dyos, ag ro mga ruyon ngaron hay parti kay Kristo. ³ Si Kristo eang ro makatao katon it kaaeam nga maeubtan ro mensahi halin sa Dyos nga pareho it maeahaeon nga manggad. ⁴ Ginasugid ko ra kinyo agod owa gid it bisan sin-o nga makapataeang kinyo bisan anda pa kamo nga gamitan it makagaeanyak nga pamisaea. ⁵ Bisan

owa ako inha hay matsa kaibahan man ninyo ako bangod inha man ro akong buot kinyo ag nalipay ako dahil nagakaeasugot kamo nga magpadayon sa inyong malig-on nga pagtuo kay Kristo.

**Si Kristo eang ro Dapat Tumanon ag Bukon it ro
mga Sueundanan ku mga Nagaturo it Saea**

⁶ Bangod inyo eon nga ginbaton si Kristo Jesus nga inyong Ginuo, dapat magkabuhi kamo kon mauno magkabuhi ro mga may maeueot nga kaangtanan kana. ⁷ Ro inyong pagtuo hay dapat nga mangin parehas ku kahoy nga nakapanggamot it madaeom ukon parehas it baeay nga padayon nga ginainobra nga may malig-on nga pondasyon. Ngani padayuna ninyo ro pagsunod sa mga ginturo kinyo parti kana agod mas maglig-on pa gid kamo sa inyong ginatuuhan. Ag magmangin mapinasaeamaton kamo permi sa Dyos.

⁸ Mag-andam gid kamo nga owa it bisan sambato kinyo nga madaea ku mga nagaturo it saea inha kinyo. Ro andang mga ginaturo hay owa it pueos ag pagpangluko nga halin eang sa andang paino-ino. Raya hay mga kaugalian ag sueundanan nga gin-obra-obra man lang ku mga tawo iya sa kalibutan ag bukon it halin kay Kristo. ⁹ Ayaw kamo magpadaea-daea dahil una gid kay Kristo ro tanan-tanan gid nga pagkaDyos it Dyos. ¹⁰ Si Kristo hay eabaw sa tanan nga may gahom ag otoridad ag kamo nga may maeueot nga kaangtanan kana hay owa eon it kueang agod kamo hay maeuwas.

¹¹ Dahil may inyo eon nga maeueot nga kaangtanan kay Kristo hay matsa gintuli man kamo pero bukon it pagtuli nga ginhimo sa eawas kundi ro pagbuoe ni Kristo ku inyong makasasaea nga kinaiya. ¹² Pagbawtismo kinyo hay pareho man nga gineubong kamo kaibahan ni Kristo ag nabanhaw man kaibahan nana tungod sa inyong pagtuo sa makagagahom nga Dyos nga nagbanhaw kana.

¹³ Kato hay pareho kamo it patay dahil sa inyong mga pageapas ag dahil owa pa habuoe ro inyong makasasaea nga kinaiya. Pero makaron hay gintaw-an kamo it Dyos it bag-o nga kabuhi dahil sa inyong maeueot nga kaangtanan kay Kristo ag ginpatawad eon it Dyos ro tanan ninyong mga kasae-anan. ¹⁴ Ro tanan naton nga pageapas sa kasuguan hay pareho it listahan it mga saea nga ikakondenar naton. Pero ginpaea ron it Dyos paagi sa pagkamatay ni Kristo sa krus. Ginbuoe ku Dyos ro ikasarang ku listahan ngato nga magkondenar katon nga matsa gineansang man rato sa krus.

¹⁵ Tag namatay si Kristo sa krus hay ginperdi it Dyos ro mga espirito

nga may gahom ag may otoridad ag ana sanda nga ginparehas sa mga bihag sa gira nga ginpararada agod makita it tanan ro andang makahueuya nga pagkaperdi.

¹⁶Ngani ayaw ninyo pag-inatuha ro mga nagahusga kinyo dahil owa kamo nagasunod sa andang mga talimad-on parti sa pagkaon o ilimnon o kon ano ro puydi o indi puydi sa adlaw it inogpahuway o dahil owa ninyo ginapahaegahi ro pagselebrar it eati ag ro iba pang Pagtililipon. ¹⁷Ro mga kasuguan ku mga Judio parti sa rayang mga butang hay nagpakita eagi ku mga ueubrahon ku paeabuton nga Maneueuwas. Makaron nga iya eon ro Maneueuwas nga si Kristo hay ana eon nga gintapos ro mga ueubrahon ngato. ^{b18}Ayaw kamo magpati sa mga nagakondenar kinyo nga bukon kamo it bagay magbaton it premyo dahil owa kamo nagatuead kanda sa pagsimba sa mga anghel ag sa pagpakuno-kuno nga mapaibunuson. Ginainsistir man ku mga tawo ngaron nga may ginpakita kuno kanda ro Dyos pero binugae ron ag bukon it matuod ay halin eang ron sa andang paino-ino nga makasasaea. ¹⁹Nagtalikod eon sanda kay Kristo nga pinakaueo ku mga tumueuo. Kon mauno ro ueo nagatao ku tanan nga kinahangeanon it eawas ag kon paano ro litid-litid nagapang-angot ku tanan nga mga kaeuta-eutahan it eawas hay makaruyon man si Kristo. Imaw ro nagatao ku tanan nga kinahangeanon ku anang mga katawhan agod magtilibyog sanda ag padayon nga maglig-on sa anda nga pagtuo suno sa plano it Dyos.

²⁰Kamo nga mga tumueuo hay nangin kaibahan eon ni Kristo sa anang kamatayon ngani nahilway eon kamo sa mga sueundanan nga ginaturo it tawo nga dapat kuno sundon agod maeuwas. Hay ham-an it nagasunod gihapon kamo sa mga sueundanan ngaron nga matsa owa gihapon kamo nagasalig kay Kristo? ²¹Ham-an it nagapati gihapon kamo sa mga sueunadanan halimbawa it “Ayaw magtabing karon,” “Ayaw magsamit karon,” “Ayaw magbuyot kara”? ²²Ro mga ruyon ngaron hay mga sugo ag turo man lang it tawo ag napatungod eang sa mga bagay nga indi eon mapuslan it uman pagkatapos gamiton. ²³Kon tan-awon, ro anda ngaron nga pagsunod sa strikto nga mga sueundanan ku andang gintukod nga relihiyon pati ro andang pagpaubos ag pagpasakit sa eawas hay matsa base sa

^{b2:17} Ro kahueugan kara hay owa it kinahangean nga magtuman sa ratong mga sueundanan agod maeuwas. Ginhimo eon ni Kristo ro dapat himuon agod maeuwas ro tawo. Pakibasa ro 2.10.

kaaeam. Pero owa ron tanan it pueos dahil owa ron it mahimo sa pagpugong sa mga maeain nga handom it tawo.

Ro Pagpangabuhi nga Makapalipay sa Dyos

3¹ Ginbanhaw kamo it Dyos kaibahan ni Kristo ngani handuma gid ninyo nga magkabuhi kon mauno dapat magkabuhi ro mga tawo nga makapaeangit kon siin si Kristo hay nagalingkod sa tuo it Dyos.² Dapat nga ro mangibabaw permi sa inyong paino-ino hay ro mga eangitnon nga mga bagay bukon it ro mga butang riya sa kalibutan³ dahil patay eon ro inyong kaila sa paghimo it saea ag ro inyong bag-o nga kabuhi kaibahan ni Kristo hay nakatago pa idto sa Dyos ag owa pa ginpakita it husto makaron.⁴ Kon si Kristo nga ginhalinan ku inyong bag-o nga kabuhi hay ipakita eon sa anang mahimayaon nga pagbalik, kamo man hay makita nga nagaambit ku anang gahom ag kadungganan.

⁵Ngani dueaa eon ro mga maeain nga buhat nga bunga ku inyong pagkamakasasaea pareho it paghulid sa bukon it inyong asawa, kalaswaan, kaueag, tanan nga mga maeain nga handom, pagkahakog nga imaw ro pagpasueabi sa manggad kaysa sa Dyos.⁶ Pinahan it Dyos ro tanan nga nagahimo it makaraya dahil owa sanda nagatuman kana.⁷ Inyo man ron anay kato nga ginahimo sa dati ninyong pagpangabuhi.⁸ Pero makaron hay dapat eon nga dueaon ninyo ro kaugot, kaakig, pagdumot, pagpakaelain sa isigkatawo, pagdinaka,⁹ ag ayaw eon kamo magpinuril sa kada isaea. Ayaw eon kamo maghimo it makaruyon tungod inyo eon nga gintalikdan ro inyong pagkamakasasaea nga nagatueod kinyo nga mag-obra it maeain.¹⁰ May inyo eon nga bag-ong kinaiya nga padayon nga ginabag-o it Dyos hasta mangin pareho ku anang kinaiya agod hikilaea pa gid ninyo it mayad ro nagtuga kinyo.¹¹ Ro mga tawo nga ginbag-o it Dyos hay paeareho eang sa anang panueok. Bukon it importante kon sanda hay Judio o bukon, natuli o owa, ulipon o bukon, ignorante o bisan pinakamapintas nga bandido man. Bali wala ron tanan basta nagatuo sanda kay Kristo ay una imaw sa tagipusuon ku tanan nga mga tumueuo ag imaw ro pinakaimportante sa tanan.

¹²Ngani bilang mga pinili it Dyos, mga pinaelain agod mangin ana nga mga katawhan ag anang hinigugma, magmangin maeueuy-on kamo, mabinuligon, mapainubuson, maeueo ag matiniison.

¹³Mangin mapinasensyahon kamo sa kada isaea ag kon may

agrabyo kamo sa kada isaea hay magpaeatawaran kamo pareho ku pagpatawad kinyo it Ginuo. ¹⁴ Ag eabi sa tanan, maghigugmaan kamo tungod ro gugma hay pareho it bugkos nga nagahugpong sa mga tumueuo agod may anda nga matuod nga pag-ueugyon. ¹⁵ Dapat nga ro paghidait nga halin kay Kristo ro magahari permi sa inyong tagipusuon tungod gintawag kamo it Dyos nga mangin sangka eawas kay Kristo nga may mayad nga pag-ililiba ag mapinasaeamaton kana. ¹⁶ Itanom gid ninyo sa inyong paino-ino ro Mayad nga Balita parti kay Kristo. Gamita ro kaeam nga gintao kinyo sa pagturo ag sa pageaygay sa kada isaea. Magkanta kamo it mga salmo ag mga sari-saring mga kaeantahon sa pagdayaw sa Dyos nga may hantop nga pagpasaeamat sa inyong tagipusuon. ¹⁷ Ag bisan ano ro inyong ginaobra ag ginahambae hay dapat nga nagapakita nga mga sumueunod kamo ni Ginuong Jesus ag pasaeamati permi ro Dyos nga Ama dahil sa ginhimo kinyo ni Jesus.

Ro Pagsueundanan ku Panimaeay it mga Tumueuo

¹⁸ Mga bayi, magpasakop kamo sa inyong mga asawa ay duyon ro bagay ninyo nga himuon bilang mga sumueunod it Ginuo. ¹⁹ Mga eaki, palangga gid ninyo ro inyong mga asawa ag ayaw ninyo sanda pagpintasi. ²⁰ Mga unga, tumana ninyo permi ro inyong ginikanan sa tanan nga butang ay nalipay ro Dyos kon obrahon ron ku mga sumueunod it Ginuo. ²¹ Mga tatay, ayaw ninyo pagpinangisgi nga owa sa lugar ro inyong mga unga agod indi magmas-ot ro andang buot ag indi sanda madueaan it gana sa pagtuman kinyo.

²² Mga ulipon, tumana ro tanan nga ginasugo kinyo ku inyong mga amo iya sa kalibutan. Tumana sanda nga hantop sa inyong tagipuson dahil sa inyong pagtahod sa Ginuo, bukon it nagatuman eang kamo kon nagatan-aw sanda agod anda kamo nga dayawon. ²³ Bisan ano ro inyong ginaobra, himua ron ninyo kutob sa inyong masarangan. Bilanga nga sa Ginuo ninyo ron ginahimo ag bukon eang it sa tawo ²⁴ bangod hasayran ninyo nga magabaton kamo ku ginatigana it Ginuo kinyo bilang inyong premyo. Dumduma ninyo nga si Kristo ro inyong matuod nga amo nga ginaserbihan. ²⁵ Pero mag-andam kamo ay ro nagahimo it maeain hay pagapinahan. Ro pina hay katumbas ku anang maeain nga buhat tungod ro Dyos hay owa it ginapasueabi kon maghukom.

4 ¹ Mga amo, trataha it tama ag parehas ro inyong mga ulipon. Dumduma ninyo nga may inyo man nga Amo sa eangit.

Mga Dugang nga Bilin sa mga Tumueuo

²Padayuna pa gid ro inyong pagpangamuyo maskin ano ro magkaeanabo. Sa inyo nga pagpangamuyo hay dapat nga mapinasaeamaton kamo ag alisto nga indi magwarang ro inyong paino-ino. ³Ipangamuyo man ninyo nga taw-an kami it Dyos it kahigayunan nga ikawali ro mensahi parti kay Kristo nga ginpahayag eon it Dyos makaron. Dahil sa akon nga pagwali ku mensahi ngaron hay iya ako sa prisohan makaron. ⁴Pangamuyui man ninyo nga mangin klaro ro akong pagturo karon ay duyon gid mat-a ro dapat nakong obrahon.

⁵Kaadya ninyo ro inyo nga pagpangabuhi sa atubang ku mga bukun it tumueuo ag kaliti ninyo ro kada kahigayunan nga matud-an sanda parti kay Kristo. ⁶Dapat nga mayad-ayad permi ro inyong mga pamisaea kon nagapakighambae kamo kanda agod ganahan sanda sa pagpamati kinyo ag mabuligan pa sanda. Kon obrahon ninyo ra hay gaantiguhan man kamo magsabat it mayad-ayad sa nagapangutana kinyo.

Mga Pagpangamusta ag mga Katapusan nga Bilin

⁷Si Tiquico lang ro magasugid kinyo ku tanan nga natabo kakon. Isaea ron imaw sa mga palangga naton nga mga igmanghod ag masaligan namon nga kaibahan nga nagaserbi sa Ginuo. ⁸Ro dahilan nga ginpaadto ko imaw inha hay agod isugid kinyo kon ano eon ro amon nga sitwasyon iya ag agod hipabaskog man nana ro inyong buot. ⁹Nagsunod man kana si Onesimo nga masaligan ag palangga naton nga igmanghod ag inyo man nga kasimanwa. Sanda lang ro gasugid kinyo ku tanan nga nagkaeanabo riya.

¹⁰Ginakumusta man kamo ku akon nga kaibahan iya sa prisohan nga si Aristarco ag pati man ni Markos nga igkampod ni Bernabe. Ginbilinan ko eon kamo kato parti kay Markos ngani kon mag-adto imaw inha hay diparaha gid ninyo imaw. ¹¹Ginakumusta man kamo ni Jesus nga ro apelyedo hay Justo. Sanday Aristarco, Markos, ag Jesus gid lang ro mga Judio nga nagabulig kakon iya sa pagturo parti sa paghari it Dyos. Nagbaskog gid ro akon nga buot dahil sa bulig ku tatlo ngara.

¹²Ginakumusta man kamo ni Epafras nga inyong kasimanwa. Nagaserbi man ron imaw kay Kristo Jesus ag grabi gid ro anang pagpinangamuyo para kinyo agod maglig-on kamo ag owa it

ikasaway sa inyong pagtuo ag sigurado gid ku tanan nga gusto it Dyos nga ipaobra kinyo. ¹³ Mapamatud-an ko ro pagtinguha ni Epafras para sa inyong kamaeayran pati man sa mga taga-Laodicia ag taga-Hierapolis. ¹⁴ Ginakumusta man kamo ni Demas ag pati man ku atong pinalangga nga doktor nga si Lukas. ¹⁵ Kumusta man inha sa atong mga igmanghod nga taga-Laodicia. Kumusta man kay Nimfa ag sa anang mga kaibahan nga mga tumueuo nga nagatlipon sa anang baeay agod magsimba.^c

¹⁶ Pagkabasa ninyo ku sueat ngara hay siguraduha gid ninyo nga ikapadaea man ra sa Laodicia agod anda man ra nga basahon kon magtililipon sanda. Tapos, bue-a man dayon ninyo ro akong ginpadaea nga sueat kanda ag inyo man nga basahon sa mga tumueuo inha sa Colosas.

¹⁷ Hambaes man ninyo si Arkipo nga asikasuhon gid it husto ro obra nga ginsalig kana it Ginuo hasta nga matapos.

¹⁸ Ako mismo nga si Pablo ro nagasueat ku mga pagpangamusta ngara. Ayaw ninyo pagkalipati nga iya ako sa prisohan. Kabay pa nga pakamaayuhon kamo it Dyos.

^c4:15 Kato, ro mga tumueuo ni Kristo hay owa pa it mga simbahan ngani ro andang mga baeay ro andang ginagamit nga simbahan.